



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**PV Sindhu All England
asayamung nung masayatetsü**

**Nepal PM-i nüburtedang
vote agütsütsü mepeshi**



VOL. XXIII ISSUE NO. 139 (ADOK 139) DIMAPUR SANGTENNÜ (TUESDAY) METSÜREMI (MARCH) 03, 2026 ₹ 5.00

FNTA Interim Council tentettsü; Naga yimten latettsü meranger: Governor Bhalla

Kohima, March 2, 2026 (TYO): Nagaland sorkari Eastern Nagaland Peoples' Organisation (ENPO) aser Eastern Nagaland nung kin hohotem den asüngdangtepa Frontier Nagaland Territorial Authority (FNTA) atema Interim Council ka tentettsü inyakdar ta Nagaland Governor Ajay Kumar Bhalla-i ashi.

Budget Session 2026-27 tenzükba anogo o jembidang February 5, 2026 nü Memorandum of Agreement nung lateta aliba ama state sorkari Ministry of Home Affairs den asüngdangya FNTA atema ozüng balaka latettsü ta Bhalla-i ashi.

State sorkari Naga yimten tekaratiba nung latettsü atema tenanzükba yur inyaker. Iba atema kin ajak nungi teshimtet nübotem, political party lennirtem aser Member of Parliament ajak adenba Political Affairs Committee (PAC) ka tentetogo ta pai ashi.

Naga yimten tebilemetsü atemasa sub-committee ka tentetogo ta Bhalla-isa shisem.

Chief Minister den cabinet minister tem aser PAC sub-committee züngsemtemi tawa tu Union Home Minister Amit Shah den ajurutepa yimjung olemtep



NLA Hall, Kohima nung 14 buba Nagaland Legislative Assembly nung Tibuba Session agiba angur.

tejakleni bener aotsü atema political-level interlocutor ka shimtsü tebilemba lemsatepogo ta paisa metetdaksü.

June 16, 2025 nü India nung Census exercise agütsü sangdongba ama phase ana lemsar agütsü. Nagaland nung mezüngbuba phase ji July 1 nugi July 30 tashi house listing aser housing census agütsü. Iba atema June 16 nungi June 30 tashi self-enumeration asütsü ta Governor-isa ashi.

Governor Bhalla-isa district administration, police aser security forces-i tensa süngjema ayuba atema tenüngsang agütsü aser iba nung kin teloktem aser civil society organizations-i

shilem tajung agiba pelaba metetdaksü.

2025 küm NDPS Act mapa kanga meranga inyakba ajanga ken o 157 benok aser nisung 260 puogo. Nagaland police-i Cyber Crime Cell aser National Cyber Crime Reporting Portal ajanga cybercrime maparen akangshiojob ta paisa ashi.

"Shamator, Niuland, Wokha aser Noklak nung Superintendent of Police office tem renema lapokogo. Külen, Ministry of Home Affairs-i Dimapur aser Kohima nung surveillance aser drug trafficking mita anüksü atema 1,400 AI-enabled ANPR aser CCTV cameras enoktsü senotsü lezmüksüogo" ta

Governor Bhalla-isa metetdaksü.

Shisaliok tsütsü Nagaland Education Project-NECTAR kübok tesayur 3,900 jungnüa training agiogo. NEP 2020 inyakba nung shilem ka ama parnok nem Professional Learning Communities ajanga training agütsüogo aser Lighthouse School Complexes 17-i school transformation strategies tenzükogo ta pai ashi.

PM-USHA kübok government colleges nung infrastructure yanglushidar aser senotsü tiptema agütsütsü atema Nagaland Scholarship Nodal Cell tentetogo ta Governor Bhalla-isa metetdaksü.

Chief Minister Health

Insurance Scheme kübok Rs 389 crore tema senotsü teyari agütsüogo aser iba ajanga nisung lakh 1.1 tema ajanzükogo. Maneni, Kohima nung State Drugs Testing Laboratory lapokogo ta paisa shisem.

Rural development tsütsü Jal Jeevan Mission kübok functional household tap connections lakh 3.41 tema enoktsüogo aser iba ya Nagaland nung kilen 94% lir. PM-KISAN kübok aluyimer lakh 2.38 tema tajanzük nguogo aser parnok nem DBT ajanga Rs 770 crore agütsüogo ta Bhalla-isa ashi.

CRIF aser NESIDS kübok lenmang mapatongtem renemogo aser Foothill Road 70% tashi renemogo aser power supply tajungba akütsü atema Tsitrongse nung 220/132/33 KV substation ka yangludat ta Bhalla-isa metetdaksü.

January 31, 2026 tashi nung GST collections Rs 987.38 crore shi bendenogo aser iba ya 37% inlokba lir aser linük nung tematiba lir ta paisa ashi.

Nagaland sorkari linük den liromedema "Viksit Nagaland @2047" vision document ka renemdar ta Governor Bhalla-isa ashi.

NGTA tesayurtemi anogo 3 buba lungkak ait

Sorkari state plan nungi itasen magütsütsü

Kohima, March 2, 2026 (TYO): Nagaland Government Teachers Association (NGTA)-i tanü agi anogo asemubaba lungkak aitogo aser state sorkari telangzüba magütsü tashi parnoki lungkak aittsü ta nenshiogo.

Sorkari olemteptsü mulunga dang lir saka inyakyim lateta aliba alema meinyaktsü ta School Education and SCERT Advisor Kekhrielhoulie Yhome-i ashi.

RMSA 2010 aser 2013 batches nungi tesayurtemi parnok itasen State Plan nungi agüjang ta akhanger.

Iba inyakyim ajanga senotsü tsütsü timtem kanga ajurutsü aser Nagaland-i central assistance nugi Rs 80 crore shi akoksatsü ta Advisor Yhome-i ashi.

Hombarnü tesayur 2293-i Directorate of School Education kima tanü agi anogo asemubaba lungkak aitogo.

"ANATG 2015 Batch tesayurtem open recruitment ajanga shimba mesüaka parnok 2,483 tashi regularize süogo. Iba nungi parnok 1,166 shi ka lungkak aiter aser tesayur 235-i dang Personnel & Administrative Reforms (PNR) Department nem nüngdakba kulikakettem agütsüogo. Tang tashi nung tesayur 100 shi indang kulitem

jangiatetogo" ta Advisor Yhome-isa ashi.

Uma Devi case nung Supreme Court-i oshidang agütsüba nung regularization ya ozüngi melaba ama aser inyakyim lateta aliba ama inyaktüsü ta shiogo.

"Tesayurtem dang appointment orders, academic certificates, medical fitness documents aser APAR records jangjashitsü atema agütsütsü shiogo. Taila mesüra mejangjaba kulikakettem putetra mapa nungi anentsütsü aser itasen agüja aliba meyipa agütsü" ta paisa ashi.

"Tesayurtemi lungkak aitba ajanga sorkar school nung kaketshirtemi timtem ajurur. Anungji tesayurtemi pei pei school-i oa sayutsüla aser mapang talangka mapa meinyakra disciplinary action agütsü" ta Yhome-isa metetdaksü.

Takhangba onük karbo tim lir saka rongshiba ajanga lemtet kecha magütsü aser inyakyim ajak ozüngi melaba ama inyaka aotsü ta paisa ashi.

Tesayurtem mali department-i koma inyaka aoer ta osangbeneri asüngdangdang "school tem nung tesayur meperir saka talirtemi inyaka arudar" ta Advisor Yhome-i langzü.

NLA Session nung asürtem bilemteta tetushi agütsü

Dimapur, March 2, 2026 (TYO): March 2, 2026 nü 14 buba Nagaland Legislative Assembly indang Tibuba Session tenzükdang tasürtem bilemteta tetushi agütsüogo.

Asür Ajit Pawar ya aika ajangshiba aser takotet lennir ka liasü. Pai pa taküm public tenzüktsü atema bendanga agütsü aser Maharashtra nunger asoshi inyak ta CM Dr. Rio-i ashi.

Dr. Rio-isa taoba Minister aser 14 buba Nagaland Legislative Assembly nung MLA teinyakdak

asür Imkong L. Imchen bilemteta tetushi agüja liasü.

Asür Imkong ji kanga dang tasütait aser teindang lennir ka liasü aser pai bilemba menungnangi dang jemi ta pai ashi.

"Asür Imkong Imchen-i public tenzükba wadang nung mapa balala inyaka aru aser pa den külemi inyaksema atema maangka ka ama züngshir" ta Dr. Rio-i ashi.

Nagaland Legislative Assembly Speaker Sharingain Longkumer-ia Nagaland Legislative Assembly nung

züngsem pezü- Asür N. Kielu, Asür. Dr. Khasu Kath, Asür. P. Mongchua aser Asür Nkhao Lotha nunger nem tetushi agütsü.

Parnok ya kanga meranga inyakerter aser bendanga agüja tenzükba lennirtem liasü. Parnoki Nagaland nung alirtem asoshi mapa tajung inyakbatemji kanga senti aser kodanga mamadoktsü ta Sharingain-i ashi.

Nagaland Legislative Assembly-i minute ka ola madoki asürtem nem tetushi agüja liasü.

MoS George Kurian-i anogo ananü atema Tuensang semdang

Dimapur, March 2, 2026 (TYO): Union Minister of State for Minority Affairs and Fisheries, Animal Husbandry and Dairying, George Kurian-i anogo ananü atema Tuensang semdangogo.

MoS Kurian-i Fish Farm Thimka, Tuensang Village semdang aser idakji ango metsürtem den ajurutepa sensaksem.

Idangji DFO Tuensang Mhomo Murry-i pa den Department ajanga road connectivity aser infrastructure majungba ajanga timtem ajuruba lemsatop aser ango tzübo talila nüngdakba ashi.

Thimka Fish Farm aser temeket nung marginal fish farming 80 tema lir ta DFO Murry-isa ashi. Union Minister

Kurian-i Fishery Pond aser Hatchery Tank repringdang.

The Minister also visited District Hospital Tuensang and Parade Ground Tuensang.

Paisa District Hospital Tuensang aser Parade Ground Tuensang semdang aser kin lennirtem, Civil Society züngsemtem aser Tuensang nungi BJP Party Unit den ajurutepa sensaksem.

March 2, 2026 nü pai Tuensang DC Conference Hall nung Head of the Offices den sensaksem mapang ka agia liasü.

Tuensang Deputy Commissioner Lithrongla Tongpi Rutsa-i Union Minister Kurian pelaa agizük aser ADC Tuensang Shelly Katiry-i PowerPoint Presentation ka

ajanga Tuensang District indang temetetsü lemsatop.

MoS Kurian-i ketdangsurtem den Mortality Rate, immunization, Public Distribution System, Skills Development, Nutrition, PM Kisan, PMAY-G, SHGs, Educational System aser National Highway 202 indang onüktem benoka lemsatop.

India Prime Minister-i Northeast region renlokdahtsütsü atema tenanzükba yur inyaker aser Centre sorkari state sorkar den yaritepa infrastructure development aser senotsü teyari agütsütsü mulunga lir ta pai metetdaksü.

Tanü Kurian-isa St. John Higher Secondary School, Tuensang semdang aser idakji kaketshirtem den ajurutepa sensaksema liasü.

NHK nung State Newborn Resource Centre semzükogo



NHK nung State Newborn Resource Centre semzükba sentong nung tangokba noksa angur.

Dimapur, Metsüremi/March 02 (TYO): Dr. Mereninla Senlem, Principal Director, Health & Family Welfare ajanga February 27, 2026 nü Naga Hospital Kohima nung State Newborn Resource Centre semzükogo.

Kinü tanur kumzükba ayuba maparen temulung agüja inyakba nung State Newborn Resource Centre (SNRC) amenokba ya tongtipang alizüing ka lir aser neonatal healthcare services tashi itshiba maparen ka alitsü.

State tesem ajunga nung kinü tanur sozükli temang anepaluba tsütsü tajungba kumdaktsütsü

atema SNRC ya centre of excellence ka ama amenok. State nung neonatal care atema SNRC ya apex facility ka ama alitsü, kong upgraded Special Newborn Care Units aser advance clinical infrastructure lungjemdaktsütsü.

Intensive Care Unit nungi balaka SNRC facility amenokba ajanga tashidak menatepba azüokba nung tali tajungba akumtsü aser kinü tanurtem kumzükba ayuba nung tajungba akumtsü.

SNRC indang nükjidong ya kinü tanur asüba ajemdaktsütsü aser nokdangtsü akokba kinü tanurtem asüba samadaktsütsü asoshi lir. Iba facility ya district

balala nung aliba SNCUs aser Newborn Stabilization Units (NBSUs) atema model centre ka ama inyaktsü, healthcare professionals atema capacity building, hub-and-spoke model ajanga structured mentoring, Facility-Based Newborn Care (FBNC) training programs aser state nung kinü tanur anepaluba tajungba kumdaktsüba mapa inyaktsü.

State nung neonatal care services tashi itshitsü atema Toyota Kirloskar-i biomedical oset agütsüba atema pelaba lemsatap. Ano SELCO Foundation ajanga iba facility solarization asütsü sentong lir.

Mokokchung district nung HPV Vaccine agütsü tenzükogo



Dimapur, Metsüremi/March 02 (TYO): Ato Kilonser Narendra Modi-i February 28, 2026 nü linük tesem ajunga atema HPV Vaccine sayatsüba sülen Kewimesin Nriame, EAC, NCS, Mokokchung ajanga March 2, 2026 nü Immunization Centre, Dr. Imkongliba Memorial District Hospital, Mokokchung nung Dr. Takosunep, Dy.CMO aser Dr. Imlisenba Lemtur, Pediatrician, IMDH Mokokchung nungertem lia HPV Vaccine sayaja liasü.

Iba sentong nung shilem agirtem den Dr. Limanaro, DPO (UIP&RCH) Mokokchung ajanga jembidang, HPV Vaccine amshi tenzükba ya India nung public health asoshi tongtipang alizüing ka alitsü aser district nung HPV Vaccination tenzükba ya maongka ka lir, ta ashi.

Iba vaccine ya campaign mode nung mezüing ita asem atema CCP (Cold Chain Point)

16 prongla nung angutsü aser iba sülen Government of India-i Universal Immunization Programme(UIP) nung lungjemdaktsütsü, ta lai ashi.

HPV Vaccine ya district nung aliba Primary Health Centres (PHCs, CHCs aser District Hospitals tem nung angati angutsü.

Iba vaccine ya cancer tashidak nungi kumzükba alitsü mozü tajungtiba lir, ta lai ashi. HPV Vaccine ya teinlonglong tetsür arishi küm 14 tain nem HPV types 16 aser 18 atema agütsütsü, koba India nung cervical cancer cases shilem 80 jungnüa iba ya ajanga adokdaktsür.

HPV Vaccination campaign ya cervical cancer azüoktsü nükjidong nung lir, koba India nung tetsürtem dak kanga pulua adokba cancer tanabuba alitsü aser küm shia nisung 42,000 dak tema takum agir," ta ashi.

2022 küm cervix cancer cases tasen 79,103 aser iba tashidak agi asüba nisung

34,805 liasü ta NPCR-ICMR data ajanga ashir.

Sorkari mezüingbo Gardasil (a quadrivalent vaccine by MSD) single dose vaccine ka Gavi den lungjemer agüja aru.

HPV vaccination campaign tenzüktsüba mapang Kewimesin Nriame, EAC, NCS, Mokokchung-i HPV vaccination campaign tenzükba ya district nung teinlonglong tetsürtem asoshi maongka lir aser iba yagi tetsürtem dak cervical cancer adoktsü aliba nokdangtsü ta ashi.

Lai iba sentong nung shilem agir aser talisa tetsür chanutem dang pei medemer tem arua vaccine agitsü ajungshitsü shia liasü.

Iba sentong nung Sentirenla Longchar, Consultant UPHC Yimyu menden liasü, kong ASHAs, UIP & RCH nungi staff, Immunization Centre, IMDH Mokokchung nungi nurses aser staff aser GSI & UNDP Mokokchung nungi staff tem dena liasü.

Mokokchung nung March 4 nü Hindu nunger dokan ajak shibangtsü

Mokokchung, Metsüremi/ March 02(TYO): Mokokchung Town nung tenteta aliba Hindu Community ajanga March 04 anogo Hindu nunger Holi benjong amongtsü aliba nungtem nung Mokokchung nübur ajak den tepela Holi benjong salem lemsateperta sangdong ka nung

metetdaktsüogo. March 04 anogo Holi benjong amongtsü nungtem nung Mokokchung town nung iba anogo Hindu nunger dokan ajak shibangtsüta nüburtem dang jilia kasa sangdong nungsa Mokokchung Town Hindu Community lenir ajanga metetdaktsü.

NPA asentenshitsü lemtet

Dimapur, March 02 (TYO) : Nagaland Press Association (NPA) asentenshitsü asoshi shisalemsatepba senden ka tan February 27 nung Nagaland Post yimozülur, Wb.Geoffery Yaden'er kidang osangtsüsang adoker aser zülurtem adenshia menogo.

Iba senden nung Morung Express, Eastern Mirror, Nagaland Post aser Tir Yimyim nungi yimozülur aser osangtsüsang adokertem dena liasü. Iba senden nung osangtsüsang adoka belenshiba nung government teinyaktsü aser ano osangbenertem aser ano osang

adokdak inyakertem asoshia teyari agütsütsü nungdakbatem benoka jembia liasü.

Item rongdak nungdaktemji mapa küma inyaka aotsü asoshi khen atema ketdangser asem shim aser parnoki March ita tamalenbosa osangbenertem senden ka ayongzükba NPA ano khen jungjunga asentenshia tenzükshitsü asoshi sentong atonga inyaktsü nungloktsü.

Item ketdangsertem rongnungji, tayonger Wb.Aochuba Yaden, temedanger Wb.Raymond Ronamai aser tezülur Akangjungla asütsü shimtet.

Joseph Hesso aser YP Chillio Khiam na State Information Commissioner shimogo

Dimapur, Metsüremi/March 02 (TYO): Nagaland Information Commission indang State information Commissioner tenangzükba agiogo.

Iba sentong ya Nagaland Civil Secretariat, Kohima indang Conference Hall nung agia liasü, kong Nagaland Chief

Secretary, Sentiyanger Imchen, IAS-i oath of secrecy ya ketdangtsüa agia liasü.

Iba sentong ya Principal Secretary, Home, Abhijit Sinha, IAS nung agi, kong Administrative Heads of Departments (AHOs), sorkar ketdangtsür, department ketdangtsürtem aser staff tem dena liasü.

Dimapur nung Galance Skilling Centre semzük



Dimapur, Metsüremi/March 02 (TYO): Dimapur nung aliba Duncan Bosti, Tajen Ao Road nung March 2, 2026 nü sarasadema Glance Skilling Centre semzükogo.

Iba sentong ya Rev. Wati Kichu aser kibongi sarasadema semzüktsü.

Iba skilling centre ya Esther Jamir, proprietor, Glance Boutique ajanga lapokba alitsü. Esther Jamir ya Northeast India nungi mezüingbuba supermodel ka lir aser küm aika fashion aser garment industry nung tejangja nübu ka ama arur aser tesüiba küm 12 tashi Glance Boutique lapoker takok nung arutar.

Lai iba sentong nung jembidang Glance Skilling Centre mangdang ya sü arba

yimya kisüing sayuba masü ta ashi. Client tem nungdakba, professional discipline adokdaktsüba aser fashion industry tajungba nung angatetsü tongtipang lir ta ashi.

Iba centre nung kaketshir temi basic & advanced cutting and tailoring angazükba kisüing masü saka pei meyong tailoring units mesüra boutiques lapoka ketdangtsüba nunga yaritsü, ta Jamir-i ashi.

Iba centre ajanga tebur aser tetsür nem practical skills, pei sasa pei dak temulung lemtetba aser entrepreneurial shisatsü agütsütsü nükjidong lir ta laisa ashi.

Iba centre nung courses tem March hopta tasembuba nungi tenzüktsü aser enrollment tang lapoka lir.

Ayatollah Khamenei tepsetba anema J&K nung longkak aiter



Srinagar, March 02, 2026: US-Israel-i Iran nung tongti lenir, Ayatollah Ali Khamenei tepsetba anema Hombarnü Srinagar nung telok kati longkak aitba noksa nung angur.

Srinagar, March 02 (Agencies): Iran nung tongti lenir, Ayatollah Ali Khamenei tepsetba anema Hombarnü-a Jammu & Kashmir nung aikati longkak aitogo.

Tetsür-tanur densema nisung meyrjang aika adenshia yimti lenmangtem nung US aser Israel na anema yimiyim ayima longkak aitogo.

Kashmir kübok Shia Muslim nütüing teimba aliba tesemtem-Budgam, Chadoora, Magam, aser Srinagar tesem balala longkak ait.

Srinagar nung commercial tiyongtsü, Lal Chowk nung longkak aiterem aikati Iran wako aser Khamenei noksa amer US aser Israel anema

yimiyim ayima liasü.

Chattergam aser Budgam district kübok tesem aika nunga nüburtem longkak aita jaja.

Longkak aiterem rongnung ka, Mohammad Ishaq Mir-i osangbenertem dang, "Khamenei ya alima nung Muslim nungertem atema teimla liasü. Tai maket nisungtem atema pai ola adoka aru aser Israel-i Palestine nungertem anema inyakba anema pai ola adoka liasü. Iba kuli ajanga pa tepset," ta metetdaksü.

Chadoora nung longkak aiterem rongnung ka, Mudasar Hussain-i, "Khamenei-i Muslim nungertem atema jembia aru aser anüolen aliba linüktem anema jembia aru, ibayongji pa

tepsit. Ozü lenir Khamenei-i Iran nung Islamic tesayuba nung taküm alitsü atema jembia aru, talisa pai tetsürtemi temeyipa sü agitsü ajungshi aser anüolen aliba linüktem libaliro, talisa yi ajemba anema jembia aru," ta metetdaksü.

Shabir Ahmad-i, "US indang asalentong tamajung anema nokdaker linük ishika rongnung Iran densema liasü. Iran-i Palestine nungertem atema nokdaka aru, ibayongji iba linük kanga takoksa angur aser tang Israel aser US nati senteper amaker," ta metetdaksü.

Jammu & Kashmir nung aliba Muthahida Majlis-e-Ulama (MMU)-ia Iran nung tongti lenir tepsetba atema sashia aitsüogo.

Middle East nung India nung million 10 lendong nung lir

New Delhi, Metsüremi/ March 02 (Agencies): US aser Israel nati Iran amakba aser Iran-ia meyipar raraba sülen tang Middle East nung tensa tamajungba küma India nungertem million 10 jungnüa lendong nung lir, ta ketdangsertem osang ka ajanga metetdaksü.

Hombarnü Ato kilonser Narendra Modi-i, tang West Asia tensa ya shisabulutsü tensa ka lir; mangatettep bentettsü atema ken o jembitsü India-i ayongzüker, ta metetdaksü.

Ministry of external affairs (MEA)-i, tang Middle East tensa atema kanga tebilemstü katsür, ta shia telok ajak dang atsü-anem akatsü metetdaksü.

Tang UAE nung India nungertem million 3.5 shi lidar, Saudi Arabia nung India nungertem million 2.7, Kuwait nung million 1, Qatar nung India nungertem 800,000, Oman nung 660,000 aser Bahrain nung India nungertem 350,000 shi lir.

Jordan, Iraq aser Israel nunga India nungertem aika lir. UAE nungbo nütüing shilem 35 shibo India nungertem lir. Parnok aika kiojen asüba mapa inyakertem, healthcare, finance aser Information Technology sectors nung inyaker.

Honibarnep Iran amakba sülen Strait of Hormuz shibangogo. Iba ya India densema Asia nungertem aliba linüktem atema rong ajanga khu bener senzüba tongti lenmang

lir.

Ano külen tanga osang ka nung, India External Affairs Minister, S Jaishankar-i phone ajanga Iran foreign minister Seyed Abbas Araghchi aser Israel foreign minister Gideon Sa'ar naprongla den jembia India-i tebilemstü katsüba lemsatepogo.

Hombarnü Cabinet Committee on Security-i iba tensa asadangogo aser Middle East nungertem aliba India nungertem taküm kümzüksü atema-a o lemtepa liasü.

Iran nung airspace shibangogo, ajisüaka India nungertem kaketshirtem densema bendanger kaketshirtem gari lenmang ajanga arrtsü adena aotsü melaogo.



March 02, 2026 nü New Delhi nung Union Finance Minister, Nirmala Sitharaman-i Asian Infrastructure Investment Bank (AIIB) Tir, Zou Jiayi den senden amendang tangokba noksa nung angur.

Hindu nungertem mesamatsü: Amit Shah

New Delhi, March 02 (Agencies): Hombarnü Union West Bengal nungertem Hindu nungertem refugee ka danga senso temeden mesamatsü, ta metetdaksü.

Paisa Bengal nung Mamata Banerjee-i aniba TMC sorkari Citizenship Amendment Act (CAA) anema nokdakba atema aitsü.

Taküm Bengal nung assembly election agitsü lia BJP atema tongti onük kaji ozüing alema arua aliba bendangertem Bengal nungertem meindoktsü tenangzüka lir.

West Bengal kübok Mathurapur yimti nung 'Parivartan Yatra' sentong nung lokti den jembidang Shah-i, "Parnoki CAA anema nokdak. Mamata Banerjee-i CAA anema menokdak asübo Bangladeshi nungertem refugee ajaki senso ngur lila. Ajisüaka Hindu nungertem refugee temi shisa mebulutsüla, ta ashitsü atema ni yagi aru. Nenok atema BJP sorkar yangi lir. Refugee ka danga senso temeden

mesamatsü," ta ashi.

Paisa, "Mamata Didi, ner Bengal nungertem Babri Mosque tanaben yanglur asü. Iba ya shiba ajanga? Babri Mosque ya tanaben yanglutsü asü? Humayun Kabir aser Mamata na kasa dang. Hindu nungertem jashidoktsü atema Mamata Banerjee-i Humayun Kabir party nungi yok aser Babri Mosque yangludoktsü atema asalentong yanglu," ta ashi.

TMC maneni aija Shah-i, "Parnoki vote mechi nung bendangertem agi Bengal süngdaksüogo," ta aitsü.

2026 West Bengal Assembly elections jakdang BJP-i 'Parivartan Yatra' ya state tesem ajaklen agir. Parnoki kilometer 5,000 ayimjema lokti senden tulu 63 aser lokti senden tila 282 ayongzüka agitsü aser tesüsa tatembangbuba sentongji Kolkata nungertem aliba Brigade Parade Ground nungertem agitsü aser iba sentong nungertem Ato kilonser Narendra Modi-i jembitsü.

Ladli scheme kübok sen crore 90 agütsüogo: Delhi CM Rekha Gupta

New Delhi, March 02 (Agencies): Hombarnü Delhi chief minister Rekha Gupta-i Sashakt Nari, Samridh Delhi programme nungertem tetsürtem atema angati LPG cylinder scheme aser Delhi Lakhpati Bitiya Yojana tenzüksüogo.

Laisa, Ladli-Ladli scheme kübok mezüingbuba shilem nungertem tetsür 30,000 nem Direct Benefit Transfer (DBT) ajanga sen crore 90 agütsüogo, ta metetdaksü.

Indira Gandhi Indoor Stadium nungertem ayongzüka agiba sentong nungertem linük Tir, Droupadi Murmu-i küm shia Holi aser Diwali benjung mapang nungertem ration card aliba kibongtem nem LPG cylinders anana angati agütsü atema scheme tenzüksü.

Delhi Chief Minister-i, "Iba ya taküm nungertem lenla asem-shisaliok, senzüsemping aser kidang tashi atema lir. Ni Delhi nungertem jalatem nem tenüngsang agütsür. Ozü sorkari asadanga mapang nungertem tetsür lakh 1.75 atema Ladli-Ladli scheme asoshi sorkar senpong nungertem sen aliba metet. Anungertem mezüingbuba shilem nungertem onoki tetsür 30,000 nem DBT ajanga sen crore 90 agütsüogo," ta metetdaksü.

Ketdangsertem ashiba agi,

scheme pezüji 'Saheli Pink Smart Card,' free LPG cylinder scheme, Delhi Lakhpati Bitiya Yojana aser 'Meri Punji Mera Adhikaar' lir.

Iba mapatong kübok Saheli Pink Smart Card ya National Common Mobility Card (NCMC) framework kübok benoka temsüa aliba tetsürtem aser transgender-i bus nungertem angati senzütettsü. Iba card ajanga Metro nunga angati senzütettsü. Card ji DM/SDM office 50 aser DTC centers kar nungertem agütsü.

LPG Cylinders scheme kübok angati gas cylinder ka Holi benjung mapang agütsü aser Diwali benjung mapang nunga angati gas cylinder ka agütsü. Gas cylinders indang senji Aadhaar-linked bank account nungertem inoktsü. Iba scheme kübok ration card aliba kibong lakh 15.50 dak tali tajangzü angutsü.

'Delhi Lakhpati Bitiya Yojana' kübok jalatem nem instalment nungertem sen 56,000 inoktsü aser jala ka arrshi küm 21 ajungba mapang nungertem sen tetemlok densemabo sen lakh 1 junger alitsü.

Scheme pezübubaji 'Meri Punji Mera Adhikaar' kübok sensotem nem tagütsü aliba senotsü agütsü atema lir.

- ALI AYOKER -

* Prime land for Urgent Sale ! * Naga united village
 * 70,000 sq. ft. * Plain stable high land
 With concrete boundary walls and natural drainage.
 * Near the main road * Any plot size available
 @ 430/- sq. ft (Negotiable & No broker)
 Contact : 7628822085 / 9366156425



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (METSUREMI) 03, 2026

Alima rara tasembuba

United States aser Israeli nati Iran amak tenzüker anogo ana süiogo aser iba rara ya par asem tsüngda dang masü saka joko alima kintem aika dak kongshia odagi, anungji tang ya manentet rarayonga ao nungbo alima kintem rongnung telok ana kümer aliba tongpang rara tasembuba asütsüsa küma aotsü ana dang lir. Tang anogo ana tsüngda nungsa Iran anasa aliba Saudi Arabia, Qatar, United Arab Emirates, Bahrain, Kuwait aser Oman linüktem nungbo Iran sepaitemi bomb tesashi missile aser drone yokba agi tesem aika nung kiojen kanga mejungi raksaogo. Atangji, item linüktemibo Iran mamak saka item linüktemji US purtem anena awazüdak lir, anungji parnokji Iran mamakyonga parnokji Iran amaker tsükchirtem yarir, ibayongji Iran-i amaker. Iran ya alima tulu aser tejen, akhidang nungi chuba aser tashitemeteteritem adokdak, anungji parnokia tangar bendanger tsüngdang melamelaabo mapudaktsü, idangji, ashiko, China aser Russia linüktemi Iran pu sema tongpang nung nokdaktsüa akok. Atangji, tanga Russia aser China nati Iran yarir saka tongpang nung külemibo menokdaker, saka kodang rara ya tesashiba aser talangba odir, Russia aser Chiba ama linüktemi Iran masem majungtsüsa akümtsü aser kodang China aser Russia na tendir North Korea-a dena denadoktsü. Joko, Israel aser US na denbo UK, France aser Germany ama limatembo denadokogo Iba rara tenzüka ya bilemdangra, US aser Israel nati tama tenzüka, anungji yimmakertemjibo Israel aser America nungertem lir, anungji iba rara tenzüka tai temeten bushia alima okadak jembu nungbo Israel aser America na aitsü. Ajisüaka, Israel aser US nati Iran amakba ya tejashi marem amaker, kechiyong parnokji Israel aser US anema kiralongratem telok balala yariba ajanga kin ana ya kanga nüken belemdaktsür. Item kiralongratem jagi Israel aser US nung yimten lenirtem taküm samatsütsü meranger. Aji oda, Donald Trump-ibo pa taküm samatsütsü asoshi Ayatollah Ali Khamenei-i anaben merangogo saka pai tama Ayatollah menep ta metetdaktsüba asenoki angashiogo. Atangji, tang dang masü saka Iran den Israel aser America nungertem ya tsükchitepa aruba kin lir, anungji parnok o parnok na tsüngda temulung melemtepi kati ka tsübua alir. Aji oda, Israel aser US-i tsübua bilembaji Iran ama linük nungji alima ajak poksatsütsüsa nuclear bomb tesashi yanglu nungbo, parnokibo tamangba yimsü kija tenüng nung tangar limatembo mapayui raksatsütsü aser ibaji talisa Israel aser US asoshi kanga lendong asütsü. Anungji, US aser Israel na asoshiibo Iran den yimjung nung alibaji tarendaktsüka bilemer, kechiyong yimjung nung alidang Iran-i US aser Israel limatem yabo alijak nung mali küma poksatsütsüsa bomb yanglura koda asütsü ta parnokji bilemer aser aji odang bilemerbabo masü. Ibayongji, taoba hopta tashi Geneva nung US aser Iran na tsüngda yimjung ken o jembiaaka, aji tiyazü nung mapang endokerba dang liasü, kechiyong US aser Israel na asoshi Iran den merarai yimjung yanglutsübajiang takoksa tuluba ajurutsüba mapa ka lia ta parnokji angateta lir. Joko, tang US aser Israel na nükjidongji Iran nung bomb yangluba tesem ajak tanük kümstütsü, Iran yimten nung tongti lenirtem taküm samatsütsü aser Iran nung parnokji mulungba Iran nungertem akümba government ka ayutsü. Ibaji US aser Israel na asoshiibo melamelar amato saka iba o ji jembitsübo temela saka mapa küma inyaktsü tasak lir. Atangji, US aser Israel nati mezüng yokba bomb agi Iran tongti lenir Ayatollah Ali Khamenei den pa den külem yimsüsür tongtitem aika taküm samatsüogo aser Iran nung bomb yangludak tesemtem poksatsüdag. Ajisüaka, Iran nung Israel aser America nungertem mulungba nung government akümtsübaji tasak asütsü, iba jagi Iran mesüngjemsü saka parnok o parnok na tsüngda lendongang tulu adoktsü. Atangji, Iran nung Iran nungertem aikati Ayatollah Ali Khamenei-i aniba government maginüi pa anema kima yimdong nung nisung meyerijang aika sendena longkak aita mungogo, idangji taoba ita anasemka tsüngdaa nisung meyerijang asemshi Iran sepaitemi khasetba aser item longkak aitba sentongtem nung tongti nisungtembo pua tasüba temerenshia agütsür asütsü. Ajisüaka, ano Iran nung Ayatollah Ali Khamenei mangyimertema par maginertem dang nungibo teimba amato adenshia mangyim jashi lemsatapa sayuogo. Iran lima telok ana madak süngjemsüngjema yimsü asütsübajibo tang tangbo US aser Israel natia meinyaktetsü.

OLEMSABANG

KÜ DANG KIBUBA, KIBUBA TAAJAR AJAK KODAK YIMLII AITSÜ MAKOK

~ L. Kika Pongener.

(Yashi adok nungi...)

Ajisuaka, arogo nung toklang tenzüker aikati; Gari-a tajungtiba 'Luxury Car' nung menur Standard nung dang ayung-ayunga senzünur....!!!??? Arogo nung tenzüker aikati arogo inyakyim küpok melinur, pei sunutsü sua dang tenzüknur. Hau-niii....Arogo nung tenzüker ajakbo yamaji masü....Tenzüker aika pei tajaba angateta, timtem arema, ajemalua tila kümer, bendanga aguja tenzüker lir-ko. Kangasa tesasatsüka, lim arogo aika nung lokti-senden alidang; senotsü (Budget) mechi nung dang mapang talangba endoka ashishitepa jembitepba angudang kangasa sungmanga bilemer...!!! Aji oda, arogo nung tenzüka ya senotsü amshitsü nukjidong nung tuluba rangloker tenzüker asü (?) ta kangasa sungmanga bilemer....!!!

Ano kanga tesasatsüka, Tsüngrem tenzüker karibo nisung rongnung takar-sensaker aser tular-tilar kanga bendanga amshiba angur; tilar aser sensaker kidangibo kipoksema moonur. Tsüngrem tenzüker karbo mapang talangka nungi appointment meyanglura ajurutsü kangasa tasaka ta nuburtemi jembiba angazük...!!! Aji oda, tenzüka menden ya tamaren menden ka amaibo mekümdaktsütsüla. Ano Tsüngrem lar karbo Pulpit nungbo 'Kodak Tenyar' amai....Saka kodang pulpit nungi ayazüka aludir....'Mamoli' nisung denbo salema tezülen shir dang salemba angudang nubur aika metsüdaker...!!! Ano Tsüngrem lar karibo pei sasa pa/laji dang nisung amai bilemba; tangarbo nisunga masü amai mezüngshiba; pai/lai dang ajak metet amai bilemba; tangarbo kecha memetet amai kangasa nema (under estimate) mezüngmeshiba....Iba amala Tsüngrem lar dakji nubur aika mettsüdaker. Ano shin'er mangdang'er karbo takar-tular ki dang anguba....Tilar aser sensakerbo mezüngshiba karbo alitsü akok....!!! Iba amala tenzüker dakji nubur aika mettsüdaker. Aji oda, tanela sempet akar kati ajak dang küsa yaritsüla.

Tanü putu nung Reverend-tem, Pastor-tem, Associate Pastor-tem, Evangelist-tem, Counsellortem, Missionary-tem, sayutsüngirtem aika pei taküm jaklaliru/libaliru yimya agi Tsüngrem lar ama mesayutetba/melitetba angudang nubur aika parnok dak metsüdaker...!!! Tsüngrem lar karbo jembishinu/jaklaliru yimya nung ngasangadema, asüküma, mezümekümba aser kangasa 'High Level' nung dang libaliruba....Yamala tenzükertem angudang nubur aika mulungjang nung tasüngdangba aika asüngdang...!!!??? Tsüngrem lar aika pei ajangzüktsü dang bilemba; sen dang penbuba tenzükertem angudang nubur aika sungmanger...!!! Ano Tsüngrem lar karbo Deobar-nu meshiteta amungtsü melena; nokleptsü semoker mapa inyaka denjiba lir....!!! Ano tamanger tajung aika Deobar-nu saisapong balala asayaba/sen asayaba angudang nubur aika sungmanger....!!!

Temeim Tsüngrem lartem; arogo, mungdang aser wadang balala nung tenzükertem....Aseni tangarbo aika ajangzük...Saka asen taküm tanelabo majangzükra kanga tesasatsüka asütsü....!!! "Kü dang 'Kibuba , Kibuba' ta ajar shiai kodak yimli-i ayitsü makok....Iba anogo nungji aikati ashitsü, Kibuba ! Onoki ne tenung nung meshinka ma ? Ne tenung nung temenen tanela maritok ama ? Ne tenung nung mapa tulu aika meinyak ama ? Idangji ni parnok dang ashitsü...."Ni nenok kodanga memetet; Nenok tamajung inyakerem ni nungi aienshiang" (Mathi-7:21-23)...."Kechiaser nisungi alima ajak ajangzük pei taküm samara pai kechi ajangzüktsü ?" Arishi piyong arogo, mungdang aser wadang balala nung tenzüka arur aser amanga arur; kodak yimli senmang mongutettsüsa sura....Kanga tesasatsüka asütsü....Tenzüka aruba aser amanga aruba ajak amajok asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantem dang Iran atema sarasademtsütsü aikati mepishir



US aser Israel senteper amakdang Iran nung tongti lenir, Ayatollah Ali Khamenei tepsetba sülen White House anasa Iran nungertem tepela nung benjungtepba noksa nung angur.

March 02, 2026: Israel aser US nati senteper amakdang Iran nung tongti lenir, Ayatollah Ali Khamenei tepsetba sülen Khristantemi Iran nung tamangba yimsü temeden alitsü aser Iran nungertem atema tarutsü tia tajungba akümtsü atema sarasademmer.

Khristan melungtet telok, Open Doors-i, Iran nung tamangba yimsü temeden alitsü, aser ibaji ajanga Iran tesem ajaklen Khrista osangtajung proktsü atema kishi lapoktsü atema sarasademmer, ta metetdaksü.

Open Doors nung mongin kati, "Khamenei süadokba ya Iran puti otsü nung kanga tongtibang mapang ka aser süoki ia agitsü mapang ka asütsü," ta metetdaksü.

Paisa, "Pa yimsüsüba kübok Iran nung tesüba küm aika Arogo kanga reshikangshia aruba, nokdangba, mita repringba aser tamangertem apuba tatalokbatemji Iran nung Khristan ka ama ni meteta dang lir," ta metetdaksü.

"Khrista sülen anidakba kija atema-a tamangertem aika kanga timtema aruogo. Timtem jenti liaka Arogoi aremzüik, sarasadem aser teimla nung tera-yanga aruogo. Iba mapang ya mangyangtsü mesüra pelateptsü mapang ka masü, saka tarutsü tia tajungba melenshitsu imlaba mapang ka lir. Iran nung ajaki taküm akhümket aser ochi temeden angutsü imlar," ta paisa metetdaksü.

Open Doors-i, "Onok sarasadem ajanga asen linük nung yimjung, tesünap aser ochi temeden atema lenmang lapoktsü," ta metetdaksü.

Reshikangshi ajanga Iran toktsür ajener Khristan kati, "Onok tanaben ozü taso limai meyipa otettsü onoki imlar," ta metetdaksü.

Islam yimsü toktsür Khristan yimsü agizüker tetsür kati, "Tang Iran nung temelenshi adokba ajanga Tsüngremi Middle East tesem ajaklen

yimjung aser tekümzüikba lidakjang ta ni sarasademmer," ta metetdaksü.

Honibarnü US Tir Donald Trump-i Truth Social ajanga, US-Israel-i anünglen nungi amakba mapang nung Khamenei tepsetogo, ta sangdonga liasü.

Taküm January ita nung Iran nung nüburtemi yimsüsürttem anema longkak aitba mapang nung Khristan 19 densema longkak aiter meyrjang aika tepseta liasü.

Trump-i, "Alima puti otsü nung kanga temenen nisung rongnung ka, Khamenei süadokogo. Iba ya Iran nung ajaki aser lima tesem balala nung aliba linüktem nung nüburtem atema temeden lir," ta metetdaksü.

Meimchir temeden atema inyaker aser Iran nung yimsü temeden atema inyakra telok Article 18-i, Khamenei tenüng ya azü tokshiba den sendaktepa lir aser minorities anema inyaker ka liasü, ta metetdaksü.

Iran nung Khamenei yimsüsüba kübok mapang shia Khristantem apu aser tepuokdak ayu; talisa 2009 küm longkak aitba sülen nungi Khristantem anema inyakra kanga bulua aküm. Iran nung yimsüsürttemi "Islam atema tsükchirtem" ta shia Khristantem anema inyaker.

"Iba ama tesempa o jembiba sülen Khristantem, talisa Islam yimsü toktsür Khristan yimsü agizükertem tamajungba reshikangshia liasü," ta Article 18-i metetdaksü.

Taoba ita Article 18, Christian Solidarity Worldwide (CSW) aser Middle East Concern külem report ka ajanga tesüba küm Iran nung Khristantem kanga reshikangshiba metetdaksü liasü.

2025 küm Khristan 254 pua liasü.

Taoba ita Open Doors nung otongdar kati, "Iran nung tarutsü tia tajungba atema ni

sarasademmer. Ni rara pu-masemer aser Iran nung kibong aika timtemba atema-a ni bilemetsür.

Tsüngrem matsüngdang meimchir ajakji senti. Ajisüaka Iran nung ka ama ni-a nüchiso aser temeden aginer," ta metetdaksü liasü.

"Khrista sülen anidakertem ama onoki tai maket nisungtem kümzüka alitsü atema sarasademtsür, yimsüsürttem rongnung atsü-anem akatsü atema sarasademtsür aser tetsübu makai sademsadema aliba region ka akümtsü atema sarasademmer. Iba ama timtem tekangshi nungi Tsüngremi tesangwa agüjang, ta sarasademmer," ta pai metetdaksü liasü.

Ano külen The Gospel Coalition-ia Khristantem dang iba rara ya tekeraba nung anentsü aser yimjung alitsü atema sarasademang, ta metetdaksü.

The Gospel Coalition-isa Khristantem dang Iran nung tamangba yimsü temeden alitsü atema sarasademba den külemi Yisu Khrista osangtajung proktsü atema kishi lapokjang ta sarasademtsü ayongzüik.

US aser Israel nati Iran nung tongti yimsüsür tepsetba pusema Family Research Council nung Tir, Tony Perkins-i, US-i inyakra ya tim dang aser nüngdaka aliba ka liasü, ajisüaka tang mapang ya pelateptsü mapang masü saka sarasademtsü mapang ka lir, ta ashi.

"Iranian Islamic sorkar ya Israel aser yimjung bushiba linüktem atema amokmeren tuluka liasü. Ajisüaka tamangertem atema iba mapang ya pelateptsü mapang masü saka sarasademtsü mapang ka lir. Tekabu ajetteptsü mapang masü saka temekok agi ali nung nendaksü mapang ka lir," ta pai metetdaksü.

Australian Christian Lobby-ia Khristantem dang Iran nung lenir tasen kübok nüburttem tipatema litettsü atema sarasademjang ta metetdaksü.

ANOGO ABEN TSÜNGREM DEN

Ango shia Chiyungtsü

"Oh, anogo shia Ne ozüng nung shisadangtsü ni koda meimer" (T. Ken 119:97)

Ninang mochitsü chisang tila (teaspoon) ka sünga yanglutsü atema ninang tilaji 4200 ben oli aruli ta senzür. Iba tetezü anogo nung 100 ben oli aruli asür aser ken orr aru nung minute 20 agir aser naro 400 dangi aor ta ashir.

Laishibaji ninang mochitzü den medemdanger (T. Ken 19:10; 119:103). Laishibaji küm 1500 tashi nung zülü. Tsüngremi putu balaka nung nisung balala den lenmang balala nung jembiba. (Ibri 1: 1). Pai pa tebilemba tarensena jungkai adoktsü (Isa. 28:10). Tsüngremi Pa kaket züludang ilunga mezülü. Iba kaket züludang Pai kanga aremzüka inyakra, kechiaser ibai kodanga memelenshitsu zülü.

Asenoki taremsük agi Lai mebushiba agi Lai-i kechi ashir aji asenoki mangatetter. Mezüng Khristantemi külemi aser kijai Tsüngrem o nung shisadanga bushiba ama tawa tanü Khristantemi meinyaker. Sayutsüngirtem aser Pastortemi nai-aa aruba nungi ter nung ka Tsüngrem nem agüjang ta sayur saka anarongtena inyaker. Anogo nung Tsüngrem o nung ghonda ka endoktsü meindokteter. Manna koba agi Tsüngrem-i pa pur arem nung küm lir jasadang mesü, ibaji Tsüngrem o temoatsü lir. (Anitet. 16:14-36). Tsüngrem o nung nangzüka aliba temoatsütemji asen meyong kümnüra asenoki Tsüngrem o bushiba nung mapang agitsüla. Tsüngrem temoatsü agitsü lenmang tatsüba mali. Shirnoki Tsüngrem o shisadanga nung mapang agir parnok temoatsüba.

Kotak nungi Manna, anogo shia chiyungtsü agitsü ni renema lidakjang.

Lima nung evangelistic sentong 'Esperanza' agitsü

March 02, 2026: Peru linük temesepba mozü achirtem jenti yimtiba, Lima nung nüburtemi lir, ta metetdaksü.

loktiliba aser tanela tsütsü Peru linük nung Khrista den tesendaktep alir nütsüng shilem aliba mapang ka nung Billy 14 dang lir.

Graham Evangelistic Esperanza Lima Festival ya Association (BGEA)-i tang mezüng masü kechiyong evangelistic sentong 1998 küm nunga Franklin Graham leniba nung Lima nung 'Esperanza Lima' ayongzüka asemnü tashi evangelistic agitsü. sentong agia liasü.

March 7-8 anogotem nung Esperanza Lima sentong ayongzüikba sentong nungji atema Peru nung pastor 2,400 BGEA Tir aser CEO, Franklin Graham-i Tsüngrem O aser local Arogo 700-i BGEA jembitsü. den yariteper.

Lima yimti nung nütsüng Iba sentong dak sendakba million 11 lir, aser ibaji linük nung Arogotemi jelia Christian Life & Witness Course training nütsüng shilem 33 lir. program ka ayongzüka agiogo.

Peru nung akhi sobaliba Iba sentong ayongzüka yimsütem samaa aoba mapang agiba ajanga Tenla kidangi ka nung evangelistic sentong moudanger aikati tekümtet ya ayongzüka agitsü. osang angashitsu aser Yisu Khrista agizüksü imlar.

Peru nung Khristan lenirtemi ashiba agi, nisung Khrista agizüksü imlar. aikati Tsüngrem dak amanger Khristan lenirtemi Lima saka Yisu Khrista denbo nung BGEA sentong atema tesendaktep mayur, ta sarasademjang aser iba metetdaksü. sentong nung Lima yimti nung

Khristana lenirtemisa, alirtem aika temoatsü angutsü nisung aika melungjang nung atema sarasademjang ta tesünap mali aser yi den mepishia metetdaksüogo.

AO OSHI ANGAZÜKDAK:

TANÜ ANGAZÜKTSÜBA OJANG



Tzüzüngozüng

(n) o zünga ayuba, o lateta yutsüba (law, decree)

* Yimsüsür tashi itta alidak tzüzüngozüng shitak amshir.

Ulu

(v) tulu aküm (enlarge)

* Chiyongtzü nung mazüokba agi pa temang ulua aküm.

OLONG PAITEP # 7431

Grid for crossword puzzle #7431 with numbers 1-18.

TIPLIN

- 1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

- 1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. hi
16. Akümüli nungi pilar

OLONG PAITEP # 7430 TELANGZÜBA

TIPLIN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER



Varanasi Municipal Corporation-i March 1, 2025 nü ghonda ka majungdang süngdong 2.5 lakh saplings atemba atema Guinness World Record ka yangluogo.

Iba ya Prime Minister Narendra Modi'er parliamentary constituency Varanasi kübok Domari nung inyak. Iba sentong nung nisung 20,000 temai shilem agia liasü aser Miyawaki method amshia ghonda ka majungdang 2.51 lakh saplings atem.

Manipur CM Khemchand-i mapatong aika lapoktsü



Imphal, March 2, 2026 (Agencies): Manipur Chief Minister Yumnam Khemchand Singh-i March 1, 2026 nü Imphal East district kübok Moirangpurel nung mapatong aika lapoktsüogo aser Napet Palli nung tongtipang lenmang ka lapoktsü.

Chief Minister Khemchand-i Pradhan Mantri Gram Sadak Yojana (PMGSY) kübok yangluba Itham Moirangpurel Bridge lapoktsü.

Paisa Pradhan Mantri Jan Vikas Karyakram (PMJVK) kübok yangluba Model Residential School aser Samagra Shiksha, Manipur kübok Moirangpurel Higher Secondary School nung Science o Arts Block yangluba lapokja liasü.

Napet Palli nung Lamlai

nungi Thoubal Dam (1:18.50 km) tashi NH-202 yanglushiba mapa paisa lapoktsüogo.

Moirangpurel Higher Secondary School nung o jembidang "iba reju nung tesayur peria maliba ajanga timtema arur aser iba asoshi nüngdakba mapatem inyaktsü" ta CM Khemchand-i nangzük.

Paisa Imphal East Deputy Commissioner dang Laikhong nung Internally Displaced Persons (IDPs)-i tajangzük manguba bushisüngdangtsü tetuyuba agütsü.

Moirangpurel Higher Secondary School mapatong ya Samagra Shiksha Manipur kübok Rs 3.78 crore endoka inyak.

Iba mapa ya Education Engineering Wing (EEW)

ajanga inyak aser parnoki classrooms, laboratories, library, toilets aser rainwater harvesting system yangluogo.

PMJVK kübok Model Residential School ya Rs 25.62 crore endoka yanglu aser senotsü teyari ya Ministry of Minority Affairs, Government of India nungi angu.

PMGSY-1 kübok Thoubal River madak Itham Moirangpurel Bridge ya Rs 645.84 lakh endoka yanglu.

"Chief Minister lenisüba kübok constituency renlokba atema tenüngsang agütsür" ta Andro MLA Th. Shyamkumar-i ashi.

"Tang aliba sorkar kübok Manipur nung terenlok maparen inyaka arudar" ta Lamlai MLA Khongbantabam Ibomcha-ia metetdaksü.

Assamese film-i US film festival nung sempet angu

Guwahati, March 2, 2026 (Agencies): US nung Accolade Global Film Competition mapang Assamese feature film Moi Eti Nixhasor nem Award of Excellence Special Mention agütsüogo.

Iba film ya National Award-winning filmmaker Bidyut Kotoky-i direct asü aser senior journalist Anuradha Sharma Pujari-i züluba otsü nung ajemdaker yanglu.

"Iba sempet ya kanga tongtipang kechiyong Movie Maker magazine ajanga top 25 shimetba rongnung Accolade Global Film Competition ya dena lir" ta Kotoky-i ashi.

Moi Eti Nixhasor otsü ya meta talangka pilar aliba Assamese yimtsüng ka nung atalokba lir. Iba ajanga tanü alima ajungalen lokti aser yimtenren tsütsü tayongzükba balala ajuruba sayur ta Kotoky-isa metetdaksü.

Iba film nung tongti shilemji theatre actor Gunomoni Baruah-i agir aser Assamese

film industry nungi senior o junior artistes-ia shilem agir.

Iba film ya USA nungsa Covellite International Film Festival 2026 nunga sayutsü shimetba lir.

Moi Eti Nixhasor film ya National Film Development Corporation (NFDC)-i Red River & Blue Hills den yaritepa produce asü.

ALIAYOKTSÜ LIR

Aoyim anasa Seitheke Basa nung. Talinür lira 8415081855 nung contact süangma

GOVERNMENT OF NAGALAND OFFICE OF THE LABOUR COMMISSIONER NAGALAND: KOHIMA New Capital Complex

No.LBR-984/84//

Dated Kohima the 2nd March, 2026.

CIRCULAR

This is to inform to all the dependants of the Industrial workers in the State, the training course on Cutting & Tailoring, Knitting and Embroidery for the year 2026 is scheduled to commence from April, 2026 at the respective Labour Welfare Centres (LWC) (i) LWC, Dimapur (ii) LWC, Tuli, Mokochung (iii) LWC, Wazeho Mini Cement Plant, Phek and (iv) LWC, Doyang Hydro Electric Project (DHEP), Doyang. The application form for the 8(eight) months training course will be issued from the respective Labour Welfare Centres during office hour. The last date for submission of the application forms will be on or before 18th March, 2026. As seats are limited applicants will be selected on first come first basis. The Department will provide all training materials, kits free of cost to each trainee throughout the training period.

Sd/- AVILE VITSO Labour Commissioner Nagaland, Kohima.

POTENTIA RESIDENTIAL
 "Exclusively For NEET Aspirants"
NEET 2026 CRASH COURSE
 Classes start from **6th March 2026**

- * COMPLETE REVISION - PHYSICS, CHEMISTRY & BIOLOGY
- * MOCK TESTS & EXAM-FOCUSED PRACTICE
- * EXPERT FACULTY & PERSONAL MENTORING
- * PEACEFUL RESIDENTIAL STUDY ENVIRONMENT


ADMISSION OPEN

17th years of Consistent Neet Result

9862032828
7005657885

Khadiruzha Ward 1
Chumoukiedima

PELABA LEMSATEPER
 Hau, ni tasü ammag ayongkhüm ajanga jaja-aka, ni kecha lendong metsübutüsü; kechiaser na kü den lir, ne mechi aser ajok agi ni sünepdaktsür. ~ Tenüngsang Ken23:4



Onoki teti meima aliba Kinungbu aser Obala asür, **A. TEMJEN AO (LEMTOR)** mapang tatsüka shiranga alidang aser February17, 2026 nü iba akümüi toktsür aoba mapang shirnokisa nübo, shisatsü, rongsen aser sarasadem agi yariogo, nenok ajak dang ozü molungjang taroktiba agi kanga dang pelaba lemsateper. Ner mapa tajung yari onoki kecha meyipa magütsütetaka asen tulusang Tsüngremi nenok ajak moatsütsü; aji ozü tamang sarasadem.

Tongtibangsa item telok dang kanga pelaba shisemer:

- * Doctors, nurses & staff of Zion Hospital Dimapur
- * Dimapur Waromung Senso Telongjem
- * Molungyimsen Senso Telongjem Dimapur
- * Molungyimsen Baptist Arogo
- * Laimen Ao Baptist Arogo
- * Darogajan-Bamunpukhuri Ao Union
- * Darogajan Naga Youth Organization (DNYO)
- * Sosemdangsem, Kinüngertem, Anükapangtem, Tembartem, Kiyongertem aser Temeimertem.

~ Temeim Kinüngtsü, Jabaso, Jalatem aser Semchirtem.

Nepal PM-i nüburtem dang vote agütsütsü mepeshi



Kathmandu, Metsüremi/ March 2 (Agencies): Nepal nung party balala election atema nüboyimtsü asoshi tatembangbuba anogo merangtepa inyaktepba mapang interim Ato Kilonser Sushila Karki-i nüburtem dang vote agütsütsü aser yimjung meraksadaktsütsü mepeshia metetdaktsüogo.

Himalaya tenemtsüung nung aliba linük nung Brehostibarnü parliament election agitsü, koba ajanga interim sorkar ya melentsü. 2025 küm lanurtemi anir linük nung mepetmesü tulu adoka sorkar atsüngtokba sülen iba interim sorkar yagi linük anir aruogo. Iba mepetmesü nung nisung 77 tepseta liasü.

Hopta ana election atema nüboyimba mapang lanur candidate tem aikati Nepal rongsenketzüng jenjang yanglushitsütsü nangzükba nguogo aser parnoki yimden yimsüsür tejentem jazükogo, shirnoki küm metsü tashi linük yimsüsüa aruogo.

"Linük yimjiyimjung nung toktsütsü aser yimden yimsüsüba takang ka amenoktsü atema voter ajaki taruba election nung shilem agitsüla," ta toaba mapang chief justice Karki-i Hombarnü sangdong ka ajanga metetdaktsü.

"Ni nenok ajak dang tanga mapa liaka itemji toktsür Brehostibarnü polling station-i oa vote agütsütsü mepeshir," ta laisa shisem.

Laisa tesunep nung election

agitsü mepeshia metetdaktsüogo. "Ni ajak dang yimjung aser tesunep nung iba election agitsü mepeshir. Nenoki shilem agiba ajanga asen democracy ya taküm litettsü," ta lai ashi.

Gen Z puri anir longkak aitba sülen ita trok lir election agitsü aliba indang jembiba mapang Karki-i ashiba agi, tensa kanga tebenja aser temela masü.

"Onok asoshi mezüngbuba mapaji linük nung azütokshi lendong ataloker aliba nungi yimjung dangi ania temzüng ozüing lenmang dangi anitsüba ya liasü," ta lai ashiba den Election Commission-i election atema maparen ajak renema lir, ta shisem.

"Election ya kecha tebandang makai ochi shia tetsübu makai agitsü atema Nepal sorkar aser commission bendanga agütsür lir," ta lai ashi.

Nisung million 19 jungnüai vote agütsütsü atema parnok tenüng züngoksemogo, kong vote 800,000 bo tang mezüngbuba shilem agitsü lir.

Parnoki House of Representatives atema züngsem 275 shimtsü, kong züngsem 165 vote agütsür indang indanga shimtsü aser 110 ya proportional representation ajanga shimtsü.

Taküm election nung candidate 3,400 dak tema direct vote nung shilem agitsü lir aser candidate shilem 30 bo arishi küm 40 tekübok lir.

Tongtibang nisungtem rongnung KP Sharma Oli

densema lir. Arishi küm 74 tain Marxist lenir ya taoba küm PM menden nungi atsüngtoka liasü.

Pa par indang constituency nung taoba mapang Kathmandu Mayor Balendra Shah den tokteptsü. Arishi küm 35 tain Shah ya rapper aliba nungi yimden yimsüsür ka kümogo. Pa dang ya Balen ta ajar.

Tena tokteptsü aliba Jhapa-5 constituency ya kanga dang tongtibang constituency ka kümogo, koba Nepal anütoklen jila aser aluyimba loktitem meyoktepa aliba tesem ka lir.

AFP news agency den sensaksemba mapang Oil-i taoba küm azütokshi lendong ataloka pa mapa nungi aginba ya mazuöktetba tashi ka ajanga liasü ta ashiba den, mepetmesü adoker aliba mapang longkak aiterem tepsettsü atema pai security force tem nem tetuyuba agütsü ta ashiba ya shitak masü, ta shiogo.

Centrist Rastriya Swatantra Party (RSP) nungi Shah ya yimden yimsüsüba melenshitsu atema lanurtem tashi temaitsü ka ama züngshir. "Gen Z pur takhangba tongtibangtibaji governance tajung lir, kechiyong linük nung ochi mashi inyakyim aika lir," ta pai AFP dang ashi.

Pa ya lanurtem atsüa arutsü merangerba dang masü saka pa Ato Kilonser akümtsü asoshi tejangrba lir.

Linük nung party tejentiba Nepali Congress tekolakba arishi küm 49 tain Gagan Thapa-i AFP dang ashiba agi, pai yimden yimsüsür tejentem dang melentepba linük yimsü asüba ya anendaktsüner.

Thapa shiba taoba mapang health minister ka liasü, pai party tekolak mapa ya January ita agizüka liasü. Pai ashiba agi, par party nungi candidate tem ya lanur aser lenir tejentem meyoktepba lir.

Election atema nüboyimba sentong ya Holi amungtsü lia tembangogo, aser candidate karibo nüboyimba sentong den külemi iba benjung mungogo.

Ken o asadangertemi ashiba agi, election agiba sülen party ka kijaibo sorkar kümteptsüa takok mongutettsü.

AO RIJU SANGDONG

Ao Riju-i (Ao Academy) achaayanga agiba Arangtet Tatidang (AT) 2026 atema Metsüremi 5, 2026 anogo nungi Shiyim (Form) tekübok agüja aliba tesemtem nungi angutsü.

- i) Wb. Aotemjen Jamir : M/No. 8731821467 (Kohima)
- ii) Wb. P. Alem Jamir : M/No. 7005501457 (Dimapur)
- iii) Ao Riju office : M/No 9089816427 (Mokokchung)

Agüja aliba tesemtem nung meinyaktetbapurtem ajak office den tongtepretepa inyaktsü mepishir. Iba Arangtet Tatidang nungzülu Metsüremi 20, 2026 tashi alitsü.

Class 9 Textbook aser Tensenyim (Revised Edition-2026) ajak office nungi peria angutsü.

Sd/-
Rev. Prof. Rongsen Lkr
Chairman

Sd/-
(S. Wati ozüküm)
Secretary

Lebanon-i Hezbollah mitkar inyaksangshi nokdang

Beirut, Metsüremi/March 02 (Agencies): Lebanon-i Hezbollah indang mitkar inyaksangshi nokdang aser sorkari par telok indang nok-nü agüjang ta shiogo, ta Lebanon Ato Kilonser Nawaf Salam-i ashi. Lebanon-i Israel den yimjung ken o jembi tenzüksü renema lir, ta paisa ashi.

Israel aser Hezbollah tsüngta tensa tamajungba akumba mapang ka nung iba sangdong ya agütsür. Israel north tsütsü Haifa nung aliba military base ka tsütsü Hezbollah-i rockets aser drones khaloktsüba sülen Israel indang fighter jets temi Lebanon yimtiba Beirut nung tayimtsü amshia amak.

Iran-i yariba teloki ashiba agi, Iran indang Supreme Leader Ayatollah Ali Khamenei tepsetba atema tayang kepzüka aser Lebanon aser yangji nüburtem atema defence ama inyak.

Sangdong ka nung, Israel-i maneni mitkar mapa inyakba aser par züngsem aser bhukumer tepsetba yong parnoki shimba mapang aser

tesem nung telangzüba agütsütsü tetemsü, ta Hezbollah-i ashi.

Iba telok yagi telangzüba magütsüi Israel-i mapang talangka military campaign mesüdaktsütsü ta tekum dangtsü ashi aser Israel mitkar dang parnok operations anentsü aser occupied Lebanese territories nungi ainshitsü ashi.

"Israel-i tanen makai tashiyim amshiba aser ozü lenirtem, lanur aser nüburtem tepsetba yong ozü sasa ozü kumzüka ayutsü aser tapet mapang aser tesem nung telangzüba agütsütsü onok nem temeden agütsür," ta Hezbollah sangdong ajanga ashi.

"Israel nunger tsükchiri ita 15 tashiyim amshiba aser occupied Lebanes territories nungi mainshiba nung tekum dangtsü telangzüba magütsüi metoktsütsü," ta ashi.

Lebanon sorkar meyong National News Agency ajanga ashiba agi, Israel-i tayimtsü amshia Beirut amakba nung nisung 31 asü aser 149 yiru.

Asmita Kickboxing Zonal League nung Naga tsür anati medal nguogo



Tabelen nungi tachichi tashi: Alemtemsü Longchar (General Secy, NAKO); Nukshikala Jamir (asayar), Lemnon L.Konyak (asayar) aser Mongsen Longkumer (Coach).

Dimapur, Metsüremi/March 2 (TYO): Nagaland Association Kickboxing Organization (NAKO) kübok Naga tsür anati Khelo India Asmita Kickboxing Zonal League (EastZone) 2025-26 nung medal ngua state nem konang tetushi bener arutsüogo.

Iba asayamung ya Siliguri, West Bengal nung February 26 nü tenzüksü aser March 1 nü tashi asaya liasü.

Mokokchung nungi asayar Nukshikala-i Low Kick 70 kg category nung gold medal angu

aser Mon nungi Lemnon L. Konyak-i Low Kick 48 kg category nung silver medal ngua liasü.

Tena ya NAKO Coach Mongsen Longkumer aser Alemtemsü Longchar, General Secretary (NAKO) nati meineroa liasü.

Iba asayamung nung Nagaland team state 11 nungi asayartem den toktepogo. Iba asayamung nung ajak senteper senpet sen lakh 11.66 agüja liasü.

Tawa NAKO kübok Naga

nunger tebur team-i 5buba India Open International Kickboxing cup, 2026 nung medal pongu ngua parnok pezübuba jenjang nung tembanga state nem konang tetushi bener arutsüba sülen tang tetsür asayartemia takok tajung ngutetogo.

NAKO ya 2000 küm tenzüker aser iba lokti tentet aser asayartemi national aser international asayamung balala nung shilem agiba mapang medal ngua state nem konang tetushi bener arutsüdar.

PV Sindhu All England asayamung nung masayatettsü



Metsüremi/March 2, 2026 (Agencies): PV Sindhu Mongolbarnü nungi asayatsü aliba All England Championships nung masayatettsü, kechiyong la Dubai nung taolen makai sabanga lir. US aser Israel nati Iran amakba sülen Gulf nung tayimtsü senzusenpong mesüdaktsüba ajanga la England-i motettsüsa kümogo.

Indonesia nunger coach Irwansyah Adi Pratama densema Sindhu'er team anena aliba tesem anasa bomb apokba sülen parnok tera agi dang jenboa liasü. Iba sülen parnok tanga tesem kati anirogo.

La All England Championships nung mezüngbuba asaya Thailand

tsür Supanida Katethong den asayatsü liasü, saka Dubai airspace aser airport tem shibanga aliba ajanga la asayamung nungi atsüingtsüsa kümogo.

Sindhu masayatettsüsa akümba mapang lar teammate tem karbo Singapore aser Africa ajanga Birmingham tongogo.

Tebur asayartem rongnung Lakshya Sen aser Ayush Shetty na kecha tebilemtsü meli-i tongogo. Sen mezüngbuba asaya world No. 1 Shi Yu Qi den asayatsü aser Aysh ya Indonesia nunger asayar Alwi Farhan den asayatsü.

Tetsür kija asaya nung Malvika Bansod mezüngbuba round nung China tsür aser

Tokyo Olympics champion Chen Yufei den asayatsü.

Unnati Hooda, shiba indang tayimtsü Honibarnü thitsüba ajanga Africa ajanga aotsüsa aküm , la mezüngbuba round nung Thailand tsür eighth seed Pornpawee Chochuwong den asayatsü.

Tebur tarep asaya nung Satwiksairaj Rankireddy aser Chirag Shetty na Malaysia nunger tarep Kang Khai Xing aser Aaron Tai na den asayatsü.

Tatesür tarep asayar Treesa Jolly aser Gayatri Gopichand na taküm mezüngbuba asaya Japan tsür Sayaka Hirota aser Ayako Sakuramoto na den asayatsü. Tenati 2022 aser 23 küm iba asayamung semfinal tonga asayaogo.

Maneni tarep temeyoktep asaya nung Dhruv Kapila aser Tanisha Crasto na Malaysia nunger Hoo Pang Ron aser Cheng Su Yin na den asayatsü aser Rohan Kapoor o Ruthvika Shivani Gadde na France nunger Thom Gicquel aser Delphine Delrue na den asayatsü.

India nunger rongnungi tang tashi nung Prakash Padukone (1980) aser Pullela Gopichand (2001) nati dang All England title bena lir. Tena sülen Saina Nehwal (2015 runner-up) aser Lakshya (2022 runner-up) nati final tongabo asayaogo.

Zunheboto nung U-23 Intra district football asayamung asayatsü

Dimapur, Metsüremi/March 2 (TYO): Deputy Commissioner, Zunheboto office sangdong ka ajanga, District Planning & Development Board (DPDB), Zunheboto-i March 19 nungi 14 tashi Public Ground, Zunheboto nung Intra-District U-23 Football asayamung ka ayongzüka asayatsü ta metetdaksüogo.

Iba asayamung ya sportsmanship ajungketsü aser temaba jenjang nung tokteptsü atema asayartem bushitettsü atema lir. Asayamung dak sendakba nung asayamung ayongzüka committee-i tongtibang tetuyuba kar agütsüogo.

Zunheboto district kübok constituency tenet prongla nungi team kakbo yoktsüla, kong asayar 18 aser ketdangsür ana alitsüla, ta shiogo.

Team tenetprongla-i iba asayamung nung kechi südir süaka asayatsüla . Iba

asayamung nung asayaba dak ajemdaker state-level asayamungtem atema district team shimtsü. Team shia nem asayamung atema renemshitsü asoshi sen 50,000 agütsütsü.

Asayamung akokba team nem senpet sen 75,000 den kuli kaket aser takok marok agütsütsü, Runner-up nem senpet sen 50,000 den kuli kaket aser shield agütsütsü. Semifinal tonga asayaba team anaprongla nem senpet sen 25,000 aser tanungba team asem nem senpet sen 10,000 den kuli kaket agütsütsü.

Asayartem anenzüksü atema tesem ya team shiai pei sasep nung achaayangtsü, metetdaksüogo.

Deputy Commissioner, Dharam Raj (IAS)-i ken o dak sendaka aliba ketdangsürtem aser sports association tem dang iba asayamung takok ngua agütsü atema tongti shilem agütsü mepeshia metetdaksüogo.

India & Afghanistan na June ita Test ka aser ODI asem asayatsü

TEST		JUN 6 - 10		9.30 AM IST New Chandigarh	
1 st ODI	JUN 14			1.30 PM IST Dharamshala	
2 nd ODI	JUN 17			1.30 PM IST Lucknow	
3 rd ODI	JUN 20			1.30 PM IST Chennai	

Metsüremi/March 2, 2026 (Agencies):

India-i ayongzüka linük nung taküm June ita Afghanistan den multi-format bilateral series ka asayatsü, kong Test ka aser One-Day Internationals (ODIs) asem asayatsü densema lir, ta Board of Control for Cricket in India (BCCI)-i Hombarnü metetdaksüogo.

BCCI sangdong ajangsa, iba asayamung ya June 6 nü tenzüksü aser June 20 nü tembangtsü aser asayatem ya tesem pezü nung asayatsü, ta metetdaksüogo.

Asayamung ya Chandigarh nung June 6 nungi 10 tashi Test ka asaya-a tenzüksü. Iba sülen June 14 nü Dharamshala nungi tenzüka ODI asayamung tenzüksü. Tanabuba ODI ya

Lucknow nung June 17 nü asayatsü aser tatembangbuba ODI ya June 20 nü Chennai nung asayatsü. ODI asaya asemprongla ya 1:30 PM IST nung tenzüksü.

Taruba asayamung ajanga team anaprongla nem taruba asayamungtem atema renemshitsü asoshi maongka agütsütsü. T20 asayamung balala asayaba sülen India team atema kidang iba asayamung nung Test asaya ka mezüngbuba asayatsü.

India team tang T20 World Cup 2026 nung asayadar aser parnok semi-finals atema qualify süogo. Suryakumar Yadav-i aniba India team yagi Eden Gardens, Kolkata nung West Indies team wicket pongu agi akokba sülen semifinal tongtetogo.

BILEMDANGANG
"Aika akaba agi masü saka jangraba agi agüjang."